

毗尼日用切要

宝华山弘戒比丘 读体 汇集



南無本師釋迦牟尼佛

說 明

本简体校正版《毗尼日用切要》电子书，根据卍新续藏第 60 册 No. 1115，宝华山弘戒比丘 读体 汇集《毗尼日用切要》影印本校正，句读仅供参考。

本电子书是免费结缘品，特此说明。

仁慧草堂

二〇一九年六月



扫码关注仁慧草堂微信公众号

毗尼日用切要

宝华山弘戒比丘 读体 汇集

早 觉

(经律通制，出家弟子，初夜后夜，精勤佛道，勿贪睡眠，懒惰放逸。故惺觉时，当诵此偈。)

睡眠始寤 当愿众生
一切智觉 周顾十方

鸣 钟

(凡晨昏鸣钟时，诣钟前，至诚合掌，诵此偈已，手方鸣钟。口或诵诸佛德号，或诵大乘经名，或诵秘咒，令一切有情，闻声离苦，咸得解脱。)

愿此钟声超法界 铁围幽暗悉皆闻
闻尘清净证圆通 一切众生成正觉

闻 钟

(晨昏于行住坐卧间，一闻钟声时，即诵此偈咒。)

闻钟声 烦恼轻 智慧长 菩提生
离地狱 出火坑 愿成佛 度众生

唵 伽啰帝耶莎诃 (三遍)

(古德云：闻钟卧不起，护法善神瞋。现前减福慧，后世堕蛇身。)

(其懒修禅诵者，报感广在经律中，兹不繁引。)

著衣

(凡著换衣时，随其次数，一一皆诵此偈，非谓寅旦一著一诵而已。)

若著上衣	当愿众生
获胜善根	至法彼岸
著下裙时	当愿众生
服诸善根	具足惭愧
整衣束带	当愿众生
捡束善根	不令散失

下单

(鸣指三下，默念此偈咒。)

从朝寅旦直至暮 一切众生自回护
若于足下丧其形 愿汝即时生净土
唵 逸帝律尼莎诃 (三遍)

行步不伤虫

若举于足 当愿众生

出生死海 具众善法

唵 地利日利莎诃 (三遍)

出 堂

从舍出时 当愿众生

深入佛智 永出三界

登 厕

(欲大小便即当行，莫待内逼仓卒。须脱换鞋脚，不可净鞋入厕。至当三弹指，有二义：一使内人知，不得迫促内人使出；二恐噉秽之鬼，令他避之。上槽复当三弹指，默念此偈咒。)

大小便时 当愿众生

弃贪瞋痴 蠲除罪法

唵 很鲁陀耶莎诃

洗 净

(大便毕，临水即念此偈咒。)

事讫就水 当愿众生

出世法中 速疾而往

唵 室利婆醯莎诃 (三遍)

去 秽

洗涤形秽 当愿众生

清净调柔 毕竟无垢

唵 贺曩密栗帝莎诃 (三遍, 用左手后二指洗之。)

洗 手

以水盥掌 当愿众生

得清净手 受持佛法

唵 主迦啰耶莎诃 (三遍)

(若但小便时, 唯用水洗手一次即净。若是大便去秽后洗手, 或用灰泥皂角, 如法洗之。△溪堂杂录云: 元佑中, 有蜀僧智超法师, 尝诵华严经, 已三十年。偶见一童子, 风貌清爽, 举手高揖。超曰: “何来?” 曰: “五台来。” 超曰: “何远至此?” 曰: “有少事欲相导故。” 超曰: “愿闻。” 曰: “吾师诵经, 故可嘉矣, 但失在登厕洗净时。秽水淋其手背, 而未尝用灰泥洗之。所用灰泥, 律制七度, 今但二三。缘此触尚有, 礼佛诵经悉皆得罪。” 言讫不见, 超惭而改过。识者或曰: “此必文殊化现, 有警于超也。” 故知洗手必须依法。因果经云: “触手请经, 当获厕中虫报。”)

净 面

以水洗面 当愿众生
得净法门 永无垢染

唵 嚩莎诃（默持二十一遍）

饮 水

佛观一钵水 八万四千虫
若不持此咒 如食众生肉

唵 嚩悉波啰摩尼莎诃（三遍）

五 衣

（梵语安陀会，此云作务衣，五条，一长一短。凡寺中执劳服役，路途出入往还，当著此衣，诵此偈咒。戒坛经云：“五条表断贪，净身业也。”）

善哉解脱服 无上福田衣
我今顶戴受 世世不舍离

唵 悉陀耶莎诃（三遍）

七 衣

（梵语郁多罗僧，此云入众衣，七条，二长一短。凡赴斋、听讲、持诵、坐禅、礼佛、礼塔、礼和尚上座、僧

和集时，当著此衣，诵此偈咒。七衣表断瞋，净口业也。）

善哉解脱服 无上福田衣

我今顶戴受 世世常得披

唵 度波度波莎诃（三遍）

大衣

（梵语僧伽黎，此云杂碎衣，有上、中、下九品衣。

下下品九条，下中品十一条，下上品十三条，皆二长一短。

中下品十五条，中中品十七条，中上品十九条，皆三长一

短。上下品二十一条，上中品二十三条，上上品二十五条，

皆四长一短。长多短少，表圣增凡减故。凡入王宫，升座

说法，入里乞食，降伏外道，当著此衣，诵此偈咒。表断

痴，净意乐也。）

善哉解脱服 无上福田衣

奉持如来命 广度诸众生

唵 摩诃迦婆 波吒悉地娑诃¹（三遍）

（盖此三衣而称福田者，增辉记云：“田畦贮水，生长

嘉苗，以养形命；法衣之田，润以四利之水，增其三善之

苗，以养法身慧命。”藏义经云：“袈裟有十种利益。一者、

菩提上首；二者、众处人天；三者、父母反拜；四者、师

子舍身；五者、龙披免难；六者、国王敬信；七者、众生

¹ 卍新续藏：唵 摩诃娑婆 吒悉帝莎诃；今按流通本校勘。

礼拜；八者、罗刹恭敬；九者、天龙护佑；十者、得成佛道。”又悲华经云：“佛于宝藏佛前发愿：‘愿我成佛时，袈裟有五功德。一、入我法中，犯重邪见等，于其念中，敬心尊重，必得三乘授记；二、天龙鬼等，能敬此袈裟少分，即得三乘不退；三、若有鬼神诸人，得袈裟乃至四寸，饮食充足；四、众生共相违背，念袈裟寻生慈心；五、若持此少分，恭敬尊重，常得胜他。’”大论云：“释子受持禁戒是其性，剃发染衣是其相。”四分律中，佛告诸比丘：“随所住处，常与三衣俱。譬如鸟之两翼，恒与身俱。汝等舍本族姓，以信出家，应当如是，所到之处，法衣随身，不应离宿。”僧祇律中，佛言：“比丘三衣一钵，须常随身，违者出界结罪，当敬三衣如塔想。”十诵律中，佛言：“护三衣如自皮，护钵如眼目，所行之处，与衣钵俱，无所顾恋，犹如飞鸟。若不持三衣，入聚落俗人处，犯罪。”五分律：“三衣谨护，如身薄皮，常须随身如鸟之羽，飞走相随。”大乘梵网菩萨戒中，佛言：“若佛子，常应二时头陀，冬夏坐禅，结夏安居，常用杨枝、澡豆、三衣、瓶、钵、坐具、锡杖、香炉、漉水囊、手巾、刀子、火燧、镊子、绳床、经、律、佛像、菩萨形像。而菩萨行头陀时，及游方时，行来百里千里，此十八种物，常随其身，违者结罪。”盖三衣一钵，乃佛佛亲持，祖祖授受，七众同遵，两乘共制。若云出家佛弟子，衣钵可离，东西两土，轨则不同者，请

阅三藏，何经何律何论许开？当知佛言可信，凡语无凭，有智慧者，勿染邪风，须坚信力尔。）

卧具

（梵语尼师坛，此云坐具，亦名随坐衣，亦名衬足衣。长佛二搩手半，广佛二搩手。僧祇律云：“如来一搩手，二尺四寸。”此约小尺，若准大尺，可二尺计。不得作三衣，不得净施及取薪草盛物杂用，唯得敷坐。若道行至坐处，取坐之。十诵律云：“新者二重，故者四重，不应受单尼师坛。”律中本制缘起，为身、为衣、为卧具故。事钞云：“为身者，恐坐地有所损故；次为衣者，恐无藉，三衣易坏故；为卧具者，恐身不净，污僧床榻故。”律云：“新尼师坛，故者缘四边以乱其色，若作者²应安缘。”五分律云：“裁作三分，续长头³，余一分帖四角，不帖则已。”根本律并寄归传中，不听礼拜用以敷展，西域五天竺罕其见闻，此方礼拜展用，不知传起何时。如遵圣制，不用为正。若论为衣，展礼无妨。详明于斯，学者随便。）

卧具尼师坛 长养心苗性

展开登圣地 奉持如来命

唵 檀波檀波莎诃（三遍）

² 卮新续藏：作；校勘：作者

³ 卮新续藏：长头；校勘：续长头

登道场

若得见佛 当愿众生

得无碍眼 见一切佛

唵 阿密栗帝吽發吒（三遍）

赞 佛

法王无上尊 三界无伦匹

天人之导师 四生之慈父

我今暂皈依 能灭三祇业

称扬若赞叹 亿劫莫能尽

礼 佛

天上天下无如佛 十方世界亦无比

世间所有我尽见 一切无有如佛者

普礼真言：

唵 嚩日啰斛

（三赞、三礼，须精诚作观；五体投地，教列七种礼，不可不知。一、我慢礼。谓依位次，以无恭敬，心驰外境，五轮不具，如碓上下；二、唱和礼。谓粗正威仪，心无静想，见人则身轻急礼，人去则身堕心疲，盖心散而口唱也；三、身心恭敬礼。谓闻唱佛名，便念佛想，身心恭敬，精

无厌怠；四、发智清净礼。谓达佛境界，随心现量，礼一佛则礼一切佛，礼一拜则礼法界，以佛法身融通故；五、遍入法界礼。谓自观身心等法，从本以来，不非法界，佛我平等，今礼一佛，即遍礼法界诸佛；六、正观礼。谓礼自佛，不缘他佛，何以故？一切众生，各有佛性，平等正觉；七、实相平等礼。谓前有礼有观，自他两异，今此一礼，无自无他，凡圣一如，体用不二。故文殊云：“能礼所礼性空寂，前三约事，后四就理。”大方广宝篋经中，智灯声闻问文殊言：“云何礼佛？”文殊言：“若见法净，名见佛净。若身若心，不低不昂，正直而住，不动不摇，其心寂静，行寂静行，是名礼佛。”比丘不得通肩著袈裟礼佛，死堕铁甲地狱。除坐禅受食，通肩不犯。比丘不得披禅衣礼佛、诵经、经行及礼尊宿、塔殿前行，死变团鱼龟鼃之类，及不得覆头，须露顶，违者结罪。唯除病时，大寒时。凡正信出家受戒者，切须慎之。）

供净瓶

（梵语军持，此云瓶。寄归传云：“军持有二种：一、磁瓦者是净用；二、铜铁者是触用。”今所明者乃净瓶也。比丘每日清旦，诵经咒毕，用净瓶盛净水，供于佛菩萨像前。欲须瓶盛水时，当观想佛菩萨尊容，具仪作礼起已，取瓶默持此偈咒。）

手执净瓶 当愿众生

内外无垢 悉令光洁

唵 势伽噜迦吽 鞞吽莎诃 (三遍)

荡净瓶真言：

(既礼佛起，持空瓶至净水所，左手撩衣，右手持瓶，徐徐先取水荡三次，每次诵此咒七遍。其荡瓶水，莫仍注净水中，须弃于外。)

唵 嚩莎诃 (二十一遍)

灌水真言

(既已荡净无尘，满灌净水，默持此咒。)

唵 嚩悉钵啰摩尼莎诃 (三遍)

(到佛前胡跪，左手持瓶，右手作普供养印，念大悲咒七遍，礼拜而退。下晚出水，结印同前，先念大悲咒七遍，心经、往生咒各七遍，出外散水于净地，手作甘露印法，口默念甘露真言。)

曩谟苏噜婆耶 怛他誡多耶 怛侄他 唵
苏噜苏噜 钵啰苏噜 钵啰苏噜 娑婆诃 (三遍)

(念时观想瓶为如意瓶，流出种种饮食。先诸天，次鬼神，后饿鬼、畜生，各获饱满。又想瓶，出楼阁、宫殿、珍宝、璎珞、伞盖、香花、衣服，无不具足，然后说十二因缘法，授彼三皈，令闻法受皈，得法喜三昧，礼拜而去。)

受食

（比丘受食，跏趺而坐，展食巾于膝上，恐饭汤菜羹堕于袈裟。请钵时，默念此偈。）

若见空钵 当愿众生
究竟清净 空无烦恼

（梵语钵多罗，此云应量器。律中不听比丘畜用杂宝铜铁木石等钵，大要有二：一泥，二铁也。僧祇律云：“钵是出家人器，少欲知足，非俗人所宜。”十诵律云：“钵是诸佛标志，不得恶用及洗手，敬之如目。”五分律云：“佛自作钵坯，以为后式。”又发轸钞云：“应法之器也。谓体、色、量三者，皆悉与法相应。”体有二：泥及铁也。色者，用麻子杏仁捣碎，涂其内外，竹烟熏治，熏作鸠鸽项色、孔雀色。所熏者为何？夏天盛物不馊，不染垢腻，有此功用，故当熏治。量者，分上中下，若准唐斗，上钵一斗，中钵七升半，下钵五升，故名应量器。达观大师云：“钵之为器，翼三宝，备六德。何以明其翼三宝？盖微此则僧无所资，僧无所资则慧命断，慧命断则佛种灭矣。彼其能清、能容、能俭、能广、能尊、能古，则六德之谓也。古由佛授，尊由天献，广则普利一切，俭则过中不食，容则施受精粗而福利平等，清则举世不忍以荤投之。如是故吾曹敢不宝重哉？”盛饭时，默念此偈。）

若见满钵 当愿众生
具足盛满 一切善法

（念供养时，以右手倚钵扶缘相障其触气，左手持钵齐眉，将钵匙外向，供文照当念毕，放钵桌上。出生，用匙取饭七粒，麪不过一寸，以左手大拇指捻无名指作甘露印，默念偈云。）

出生

（一向传云：“朝食念法力不思议，午斋念大鹏金翅鸟。”以理推之，毋论朝食、小食、午斋，凡念供养出生者，必须二偈并持，堪合本旨，否则恐落偏见，堕于非法耶。）

法力不思议 慈悲无障碍
七粒遍十方 普施周沙界

（将匙中饭给与侍者送去，匙朝里向，默念咒云：）

唵 度利益莎诃（念咒三遍，弹指三下）

大鹏金翅鸟 旷野鬼神众
罗刹鬼子母 甘露悉充满

唵 穆帝莎诃（念咒三遍，弹指三下）

（今时每见以指印表喻须弥山，将食周绕数次，或复绕竟，翻转手印，种种做作，核考经律，不出典章，全失威仪。若论理，唯左手结印，右手出食，口中默诵偈咒，是其正也。按南海寄归云：“西域僧众，赴供受食处，上设

一圣僧座，边旁设一小桌，安一盆器，供鬼子母。凡行食时，先供圣僧，次供现前大众，后供鬼子母食，无有各各出生之制。今顺东土古仪，虽各各出生，但不可种种做作也。”)

侍者送食

汝等鬼神众 我今施汝供
此食遍十方 一切鬼神共

唵 穆力陵莎诃（三遍，侍者送食回，维那唱僧跋云：）

佛制比丘，食存五观。散心杂话，信施难消。
大众闻磬声，各正念。

（律中，佛制众僧受食唱僧跋者，因外道请佛及僧，密下毒药于食中，佛令诸比丘一齐唱云：“三跋罗伽多。”所有毒药，皆变为上妙美味。众食安乐，免其毒害。言僧跋者，“僧”即受食之僧众，“跋”即所唱之秘咒也。梵语“三跋罗伽多”，此云“等供”，谓众僧食皆平等故；又云“善至”，谓供具善成，食时复至故。今此方唱五观，令众一心受食；而为僧跋者，一则无有外道毒害故，二则令人惭愧受食故。是以虽非正制，东夏通行。）

执持应器 当愿众生
成就法器 受天人供

唵 枳哩枳哩，嚩日啰吽發吒（三遍，捧鉢当胸受食，三匙有节）

（初匙）愿断一切恶（二匙）愿修一切善（三匙）誓度一切众生（如是行者，承此咒愿力，胜河沙七宝，百味饮食，供养诸佛、菩萨、贤圣僧也。）

（○五观无违）

- 一、计功多少，量彼来处。
- 二、忖己德行，全缺应供。
- 三、防心离过，贪等为宗。
- 四、正事良药，为疗形枯。
- 五、为成道业，应受此食。

（一、计功多少。智度论云：“此食，垦植收获，舂磨淘汰，炊煮及成，功用甚多。”量彼来处。僧祇律云：“施主减其妻子之分，求福故施。”凡受食时，当作此观。二、忖己德行，全缺应供。毗尼母律云：“若不坐禅诵经，营三宝事，及不持戒，受人信施，为财所堕，则不宜受食，德行若全，则可应供受食。”凡受食时，当作此观。三、防心离过，贪等为宗。明了论疏云：“出家先须防心三过，谓于上味食起贪，下味食起嗔，中味食起痴。以此不知惭愧，堕三恶道。”凡受食时，当作此观。四、正事良药，为疗形枯。谓饥渴为主病，四百四病为客病，故须以食为医药，用资其身。凡受食时，当作此观。四百四病者，人身假地、

水、火、风四大所成。一大不调，则生百一种病，四大共成四百四病。五、为成道业，应受此食。谓不食则饥渴病生，道业何成？增一阿含经云：“多食致苦患，少食气力衰，处中而食者，如秤无高下。凡受食时，当作此观。）

结斋先念准提咒，次念此偈云：

所谓布施者 必获其利益
若为乐故施 后必得安乐
饭食已讫 当愿众生
所作皆办 具诸佛法

洗钵

以此洗钵水 如天甘露味
施与诸鬼神 悉皆获饱满

唵 摩休啰悉莎诃（三遍）

展钵

如来应量器 我今得敷展
愿共一切众 等三轮空寂

唵 斯麻摩尼莎诃（三遍）

受齋

财法二施 等无差别

檀波罗蜜 具足圆满

取杨枝

(律中名曰齿木。杨有四种，皆可梳齿也。一、白杨，叶圆；二、青杨，叶长；三、赤杨，霜降叶赤；四、黄杨，本性坚緻难长。今咸以柳条当杨枝，柳条垂下，乃小杨也。若无柳处，将何梳齿？须知一切木，皆可梳齿，皆名齿木。但取性和有苦味者嚼之，不独谓柳木一种。)

手执杨枝 当愿众生

皆得妙法 究竟清净

唵 萨吧嚩述答 萨哩吧 答哩嘛 萨吧
嚩述怛唎 唵 嚩莎诃 (后净法界咒，二十一遍)

嚼杨枝

嚼杨枝时 当愿众生

其心调净 噬诸烦恼

唵 阿暮伽 弥摩隸 尔嚩迦啰 僧输馱
你 钵头摩 俱摩啰 尔嚩僧输馱耶 陀啰陀
啰 素弥么嚩莎嚩诃 (三遍)

(凡嚼杨枝时，须令涎尽，然后以水漱之，不得含水同梳。其嚼杨枝，有五种利益：一、口不苦；二、口不臭；三、除风；四、除热；五、除痰瘕。若用残者，当弃屏处，

不得掷大众行坐之所。)

漱口

漱口连心净 吻水百花香

三业恒清净 同佛往西方

唵 奄 奄罕莎诃 (三遍)

出锡杖

(梵语“隙弃罗”，此云“锡杖”，乃三世诸佛所持，以彰智行功德，净除烦恼业障。比丘每日早食竟，齿木已，须礼佛出杖。若有白衣及沙弥，令彼授与。若无，礼佛三拜起已，自取持出，向东拭尘，如法作观。其观行威仪，广详锡杖经中。手取杖时，默诵此偈咒。)

执持锡杖 当愿众生

设大施会 示如实道

唵 那唵嚩 那唵嚩 那唵吒钵底 那唵
帝 娜夜钵儻吽发吒 (三遍)

敷单坐禅

若敷床座 当愿众生

开敷善法 见真实相

正身端坐 当愿众生

坐菩提座 心无所著

唵 嚩则啰 阿尼钵罗尼 邑多耶莎诃（三遍）

睡眠

（临睡，合掌面西，观想念佛十声，或百千声，或万声已，即诵偈云。）

以时寢息 当愿众生
身得安隐 心无动乱

① 阿

（观想阿字轮，一气持二十一遍，然后卧。卧须右胁，名吉祥睡。不得仰卧、覆卧及左胁卧，不得脱里衣小衣卧，当须忆念本参。）

取水

（梵语“钵里萨罗伐拏”，此云：“滤水罗”。律中，诸比丘闻佛制戒已，不知作滤水囊。佛听如杓形，若三角，若作宏墪，若作滤瓶，若患虫出。听安沙在囊中，不应弃陆地，还安著水中。会正记云：“若作囊，须用细熟绢为上。若无细绢，细绵布亦可。”僧祇律云：“看水时，不应以天眼看，亦不得使暗眼人看，乃至能见掌中细文者得看。不得太速，不得太久，当如大象一回顷。若水中极微细者，

不得就用洗手面及大小行。”缙门警训云：“滤囊乃行慈之具，济物之缘，大行由是而生，至道因兹而克。”凡取水时，诵此诸佛德名偈咒，功德无涯，可谓真持戒者。）

若见流水 当愿众生
得善意欲 洗除惑垢

南無欢喜庄严王佛

南無宝髻如来

南無无量胜王佛

唵 嚩悉波罗摩尼莎婆诃（三遍）

若见大河 当愿众生
得预法流 入佛智海
若见桥道 当愿众生
广度一切 犹如桥梁

浴 佛

我今灌浴诸如来 净智庄严功德聚
五浊众生令离垢 同证如来净法身

赞 佛

赞佛相好 当愿众生
成就佛身 证无相法

唵 牟尼牟尼，三牟尼萨嚩贺

绕塔

(僧祇中，礼佛不得如痴羊。又礼佛塔，应当右旋，如日月星绕须弥山，不得左旋。旋绕有五事：一、低头视地；二、不得踏虫；三、不得左右视；四、不得睡地；五、不与人语。又得五福：一、后世得端正好色；二、得好音声；三、得生天上；四、生王侯；五、得泥洹道。)

右绕于塔 当愿众生

所行无逆 成一切智

南無三满多 没馱喃 唵 杜波杜波娑婆
诃 (三遍)

看病

(律制具五德者，方听看病。一、知病人可食不可食，可食应与。二、不恶贱病人大小便、涕吐；三、有慈愍心，不为衣食；四、能经理汤药，乃至差、若死；五、能为病者说法。己身于善法增益，虽不久看病苦，但一见时，即诵此偈咒。以八福田中，看病是第一福田。)

见疾病人 当愿众生

知身空寂 离乖诤法

唵 室哩多 室哩多 军吒利莎嚩贺 (三遍)

剃发

(文殊菩萨所集剃发日，初四、初六、初七、初八、初九、初十、十一、十四、十五、十六、十九、二十二、二十三、二十四、二十五、二十六、二十九，默念此偈咒。)

剃除须发 当愿众生

远离烦恼 究竟寂灭

唵 悉殿都 漫多啰 跋陀耶 娑婆诃 (三遍)

沐浴

(律制比丘，半月一浴，不得过，除病时、热时、作时、风时、雨时、道行时不论。又则沐浴，当择其日，所忌者六斋日，斯日诸天下界，察人善恶，宜修善作好事。所谓六斋日者，每月初八、十四、十五、二十三、二十九、三十。凡入浴，当将净衣挂净竿上，触衣挂触竿上，不得浴堂小遗，不得共人语笑，不得洗僻处。凡有疮癣，宜在后浴。或有可畏疮，犹宜回避，免刺人眼。默念此偈咒。)

洗浴身体 当愿众生

身心无垢 内外光洁

唵 跋折啰恼迦吒莎诃 (三遍)

洗 足

若洗足时 当愿众生

具神足力 所行无碍

唵 嚩莎诃 (三遍)

沙弥十戒相

(沙弥有二种：一、形同沙弥；二、法同沙弥。若但剃度，未沾戒品，名曰形同沙弥。若受十支净戒，名曰法同沙弥。法同中又分三种：自七岁至十三岁，号驱乌沙弥；十四至十九，号应法沙弥；二十已上，号名字沙弥。)

一曰不杀生

二曰不盗

三曰不淫

四曰不妄语

五曰不饮酒

六曰不著香华鬘不香涂身

七曰不歌舞倡伎及故往观听

八曰不坐高广大床

九曰不非时食

十曰不捉持生像金银宝物

沙弥应具五德，应知十数。

福田经云：沙弥应知五德，一者，发心出家，怀佩道故；二者，毁其形好，应法服故；三者，割爱辞亲，无適莫故；四者，委弃身命，尊崇道故；五者，志求大乘，为度人故。僧祇律云：“应为沙弥说十数，一者，一切众生皆依饮食；二者，名色；三者，知三受；四者，四谛；五者，五阴；六者，六入；七者，七觉意；八者，八正道；九者，九众生居；十者，十一切入。

沙弥尼十戒相

(同上不重列)

式叉摩那戒相

(梵语“式叉摩那尼”，此云“学戒女”。佛听十岁曾嫁，及十八童女，与二岁学戒以净身，与六法以净心。于尼僧中，集众白四羯磨，与满十二及满二十，方受具戒。若学年未滿，六法不净，不与受比丘尼具足戒。)

一曰不淫

二曰不盜

三曰不杀

四曰不妄语

五曰不非时食

六曰不饮酒

(律制式叉摩那、沙弥、沙弥尼，此下三众，应持上下二衣，一当安陀会，一当郁多罗僧，乃是缦衣，非割截田相衣也。所持钵盂是铜器，非应量钵多罗也。今本山，凡是十八岁已下至七岁，欲受沙弥戒者，如律令造二顶缦衣行持。若是年满二十，来乞受具足戒者，其所办三衣，皆是割截田相，及应量钵器。虽无缦衣，亦方便许受沙弥十戒。著用行持，一则受具不远，莫过以沙弥戒，为比丘戒之基本故；二则衣具难得，欲令求觅缦衣，反成戒障因缘故。今预明于此，使学律者知佛制故，非显异惑众故。△又则旧本中，将比丘五篇戒相，开列沙弥戒相后，今削去不存，附两乘布萨正范后。佛制不听沙弥及白衣知五篇戒相，恐受具成遮，犯贼住之咎故。)

优婆塞戒相

一曰不杀

二曰不盗

三曰不邪淫

四曰不妄语

五曰不饮酒

(此五戒，若不能全受者，或受持一戒、二戒、三戒、四戒。佛慈方便，一一随听。若是笃信智人，五戒全持，

方为正受。)

八关斋法戒相

一、不杀

二、不盗

三、不淫

四、不妄语

五、不饮酒

六、离华香瓔珞，香油涂身

七、离高胜大床，及作唱伎乐，故往观听

八、离非时食

(毗婆沙论云：“夫斋者，以过中不食为体，以八事助成斋体，共相支持，名八支斋法，亦名八关斋，”成实论云：

“何故但说离八事？然此八事是门，由此八戒，离一切恶。是中前四是实恶，饮酒是众恶之门，余三能起障道因缘故。以八法成就五乘，关者是闭塞诸恶也。”此八戒但受一日一夜，或月八日、十四日、十五日、或六斋日，其六斋日者，准前沐浴中所明，或诸佛菩萨诞日，或自己生日，皆可受持。论云：“若受八戒，应一日一夜，莫使与终身戒相乱。”此八戒，不论已受五戒，及受在家菩萨戒者，皆可受之。迩来剃发出家者，多有受持八戒，为师者亦云受与五八戒，而不精究律教，好为人师，自盲盲人，作办皆非。今本山，

凡是出家者，但来乞受八戒，欲披五衣、七衣者，概不听允。△又则在家优婆塞戒、优婆夷戒，佛制不许披割截福田衣，令著礼忏衣礼佛诵经，即缙衣也。盖在家二众，佛令自己随力供养三宝，不听受他人四事，既非众生福田，故不许著割截福田衣。又纵是受在家菩萨戒，令储蓄三衣、钵盂、锡杖，奉供佛前，遇有出家僧尼，缺其衣具者，及有年满欲受具者，乏其衣钵，随乞施彼，更造奉供，不得不储蓄。自身听著缙衣一顶礼拜持诵，不听城邑聚落披著往来。若入寺礼三宝，当囊盛随身，入寺中方著。所以在家听离衣，若恒披则犯制；出家不听离衣，若离则犯制。今本山，凡有在家信心男女二众，乞受八戒及菩萨戒者，令造缙衣礼敬三宝，不听披条相田衣。△又菩萨戒相，此毗尼日用中不列，附布萨正范卷中。）

毗尼日用切要（终）

回向偈

愿以此功德 庄严佛净土
上报四重恩 下济三途苦
若有见闻者 悉发菩提心
尽此一报身 同生极乐国

南无护法韦驮尊天菩萨



此咒置经书中可灭误跨之罪